

ԱԶԴԱՐԱՐ

ՏԵՂԵԿԱՏՈՒ ԱՌԱՋՆՈՐԴԱՐԱՆԻ ՀԱՅՈՑ ԲՈՒԷՅԹԻ ԵՒ ՇՐՋԱԿԱՅԻՑ ՀԱՅՈՑ ԹԵՄԻՆ

P.O.Box: 8157, Salmiyeh 22052- Kuwait. Tel: 965-25614392, Fax: 965-25638312, e-mail: prelacy@armenianprelacykw.org

ՆՈՐ ՇՐՋԱՆ, Թ. Տարի, Թիւ 390, Ուրբաթ, 23 ՅՈՒՆԻՍ, 2017

ՀԱՅԿԱԿԱՆ

Վարչապետ Կարէն Կարապետեան Ազգային Ժողովին Ներկայացուց Կառավարութեան Ծրագիրը. «Ունինք Ապագայի Յստակ Տեսլական, Գիտենք, Թէ Ի՛նչ Պէտք Է Փոխել»

Հայաստանի կառավարութիւնը քաջատեղեակ է այն սպասելիքներուն, որոնք ունին հասարակութիւնը եւ իր ծրագիրին մէջ հաշուի առնուած են այդ սպասելիքները: Ազգային ժողովի մէջ կառավարութեան ծրագիրի քննարկման ընթացքին այս մասին ըսած է Հայաստանի վարչապետ Կարէն Կարապետեան: «Մենք յստակ կը պատկերացնենք մեր ներկան, գիտենք ի՛նչ խնդիրներ եւ կարելիութիւններ ունինք: Ունինք նաեւ ապագայի յստակ տեսլական, գիտենք, թէ ի՛նչ պէտք է փոխել: Մենք կը ներկայացնենք առարկայական ծրագիր», «Արմէնփրես»-ի հաղորդումով՝ ըսած է վարչապետը:

Հայաստանը փոքր եւ քիչ պաշարներ ունեցող երկիր է, որուն սահմաններուն մեծ մասը փակ է: «Հայաստան ծովային ելք չունեցող երկիր է, որուն չորս սահմաններէն միայն երկուքը բաց են: Մեր երկիրը կը բախի շրջանային մարտահրաւերներու, որոնք կը սպառնան մեր անվտանգութեան: Այս պարունակին մէջ առանցքային է Հայաստանի Հանրապետութեան եւ Արցախի Հանրապետութեան անվտանգ զարգացման իրաւաքաղաքական, ռազմական կայուն երաշխիքներու ձեւաւորման խնդիրը: Մենք կանգնած ենք մեր սահմանները պաշտպանելու մարտահրաւերներուն առջեւ: Այս հանգամանքներէն մեկնած՝ մենք պէտք է շարունակենք զարգացնել մեր զինուորական կարողութիւնները՝ ապահովելով զինուած ուժերու մարտունակութիւնը, մշտապէս կատարելագործումն ու համընթաց արդիականացումը, ինչպէս նաեւ ժամանակակից սպառազինութիւնը: Այս ամէնը չեն ըսեր հիասթափեցնելու համար: Մենք յստակ կը պատկերացնենք իրականութիւնը: Կան երկիրներ, որոնք գտնուած են աւելի վատ մեկնարկային պայմաններու մէջ, սակայն կրցած են ժամանակի ընթացքին հասնիլ աւելի լաւ պայմաններու: Մեր երկիրը շէն ու բարեկեցիկ դարձնելու բանալին մեր ձեռքն է: Մենք պիտի յաջողինք, եթէ անմնացորդ նուիրուինք մեր գործին եւ քրտնաջան աշխատինք», ըսած է վարչապետը:

Վարչապետ Կարէն Կարապետեան ընդգծած է, որ իրենց աշխատանքի որակէն եւ հասարակութեան արձագանգէն կախուած է, թէ որքա՛ն արագ կը հասնին իրենց նախանշած նպատակներուն: «Մենք պատասխանատուութենէ չենք խուսափիր: Այս ծրագիրը կը ներկայացնէ մեր պատկերացումը եւ տեսլականը մեր երկրի զարգացման յառաջիկայ 5 տարիներուն համար: Անիկա նաեւ հիմքեր կը ստեղծէ մեր երկրի երկարաժամկետ զարգացման համար: Ծրագիրի հիմքին մէջ դրուած է անվտանգ, արդար եւ խելացի Հայաստան ունենալու տեսլականը», ըսած է ան:

Հայաստանի Հանրապետության վարչապետը ներկայացուցած է նաև կառավարության ծրագրի թիրախները՝ 5 առ հարիւր համախառն ներքին արտադրության աճ, նուազագոյն աշխատավարձի բարձրացում 25 առ հարիւրով, արտահանման աճի նշանակալի աճի ապահովում՝ ապրանքներու եւ ծառայութիւններու արտահանման մասնաբաժինը համախառն ներքին արտադրության մէջ հասցնելով 40-45 առ հարիւրի, աղքատութեան կրճատման ապահովում՝ իջեցնելով զայն 12 տոկոսային կէտով:

Դաւիթ Բաբայեան. «Ազրպէյճան Կը Փորձէ Փրկել Իր Ոսնահարուած Ինքնասիրութիւնը»

«Ազրպէյճան, հայերու կողմէ հետախուզական ներթափանցման փորձերու մասին կեղծ լուրեր տարածելով, նպատակ ունի փրկել իր ոսնահարուած ինքնասիրութիւնը: Նման ստայօղ լուրեր տարածելով՝ Ազրպէյճանի յանցաւոր իշխանութիւնները կը փորձեն սեփական ժողովուրդին ցոյց տալ, որ իրենց բանակը ուժեղ է եւ կրնայ ձախողեցնել հայկական կողմի՝ մինչեւ ատամները զինուած ներթափանցող խումբերու փորձերը», «Փանորամա»-ի թղթակիցին հետ զրոյցի մը ընթացքին այս մասին ըսաւ Արցախի նախագահի մամլոյ բանբեր Դաւիթ Բաբայեան:

«Չի բացառուիր, որ վաղն ալ իրենց տաղաւարներուն մէջ կը նկարահանեն հայկական զինուորական համազգեստով քանի մը հոգի, որպէսզի ցոյց տան, որ իբրեւ թէ ինչ որ մարդիկ եկած են: Չի բացառուիր նաեւ, որ հայկական կողմի ներթափանցող խումբերու գործողութիւններուն մասին կեղծ լուրեր տարածելով՝ ազրպէյճանցիները նպատակ ունին միջազգային հանրութեան հասկցնել՝ հայերը յարձակումներ կը կատարեն, մենք ալ ձեռով մը կը պատասխանենք անոնց՝ հայ զինուորներ սպաննելով», ըսաւ Բաբայեան:

Դաւիթ Բաբայեանի համաձայն, սակայն, բոլորին յայտնի է, թէ ո՛վ է սահմանային դէպքերուն իրական նախաձեռնողը:

Դաւիթ Իշխանեան. «Շատոնց Ժամանակը Հասած Է Գիտակցելու, Որ Միջազգային Հանրութեան Հետ Յոյսեր Կապելը Զուր Է»

«Արցախի մէջ երբեք խուճապային տրամադրութիւն չէ եղած, նոյնիսկ անցեալ ապրիլին եւ անոր յաջորդող ժամանակահատուածին: Սահմանային լարուածութիւնը դարձած է, կարծես թէ, առօրեայ վստահաբար նաեւ մտահոգիչ, բայց բոլոր պարագաներուն Արցախը իր առօրեայ կեանքով կ'ապրի եւ կը ստեղծագործէ», «Հրապարակ»-ին հետ զրոյցի մը ընթացքին, անդրադառնալով վերջին օրերուն սահմանային լարուածութեան բարձրացումին, ըսաւ Արցախի Ազգային ժողովի «Դաշնակցութիւն» խմբակցութեան ղեկավար, պատգամաւոր Դաւիթ Իշխանեան:

Դ. Իշխանեան չի բացառեր պատերազմի վերսկսումը, իր խօսքերով՝ երբեք պետք չէ ըսել՝ երբեք. «Այս սաղրանքները բնականաբար ունին իրենց նպատակները, կը կարծեմ՝ աշխարհաքաղաքական զարգացումները, Միջին Արեւելքի եւ մեր շրջանին մէջ տեղի ունեցող փոփոխութիւններն ու ստեղծուած իրավիճակը, Ազրպէյճանը առիթ է առիթ կը մղեն նմանատիպ գործողութիւններու: Ազրպէյճան նաեւ կը փորձէ իր ներքին խնդիրները լուծել սահմանային իրավիճակը լարուած պահելով»:

Իշխանեան կը նշէ, որ շատոնց ժամանակը հասած է գիտակցելու, որ միջազգային հանրութեան հետ յոյսեր կապելը գուր է. «Մեր ժողովուրդը շատոնց պէտք է հասկցած ըլլար, որ միջազգային հանրութեան հետ մեծ յոյսեր պէտք չէ ունենանք եւ միջազգային հանրութեան կողմէ ճնշում գործադրելու հետ յոյսեր կապել եւ երազանքներ ունենալ կը կարծեմ անհիմաստ է»:

Անդրադառնալով Մինսքի խմբակի համանախագահներու վերջին յայտարարութիւններուն, երբ առաջինին պարագային դատապարտած էին Ազրպէյճանական գործողութիւնները, իսկ երկրորդը կրկին «անատամ» յայտարարութիւն էր, Իշխանեան նշեց, որ քանի տակաւին չկան գործնական քայլեր, յայտարարութիւնները արժէք չեն կրնար ունենալ: «Կը կարծեմ պէտք է միշտ գնահատել Մինսքի խմբակի համանախագահներու յայտարարութիւններն ու գործողութիւնները, բայց այդ բոլորը նկատելի հասցեական եւ բաւարարուիլ յայտարարութիւններով բաւարար չէ: Յայտարարութիւնները կրնան գործնական ըլլալ, երբ կիրարկուին Վիեննայի եւ Ս. Փեթերսպուրկի համաձայնութիւնները», ընդգծեց Իշխանեան:

Անդրադառնալով այն կարծիքներուն, թէ սահմանային լարուածութիւնը ուղղուած է ժողովուրդը ճնշելու եւ հողերը յանձնելու, պատգամաւորը ըսաւ. «Արդէն մեզի համար շատ պարզ է, որ Ազրպէյճանը տարիներէ ի վեր որդեգրած է մաշեցնող պատերազմի քաղաքականութիւնը եւ կը փորձէ որոշակի իրավիճակ ստեղծելով պարտադրանքի մեքանիզմներ կիրարկել, բայց կը կարծեմ՝ մենք, գիտակցելով այդ ամէնը, կրնանք հակընդդէմ քայլերու ձեռնարկել եւ հասկնալով նաեւ անոնց որդեգրած մարտավարութիւնը, որեւէ ձեռով չենք կրնար թոյլ տալ անոնց իրենց նպատակին հասնելու: Ի սկզբանէ ըսի, որ Արցախը կ'ապրի իր առօրեայով, մեզի համար հոգեբանական այնպիսի մթնոլորտ ստեղծել, որ կարենան պարտադրանքը իրականացնել, կը կարծեմ՝ անկարելի է: Մենք ունեցած ենք աւելի ծանր պայմաններ, ապրած ենք աւելի ծանր ժամանակներ եւ այդ կարգի իրավիճակներու մէջ կրցած ենք յաղթահարել մեր առջեւ ծառայած ամէն մարտահրաւեր»:

Պաքու Համաձայն է Առարկայական Բանակցութիւնները Շարունակելու

Պատասխանելով Ազրպէյճանական «Թրենտ» գործակալութեան հարցումներուն՝ Ազրպէյճանի արտաքին գործոց նախարար Էլմար Մամետեարով 20 Յունիսին յայտարարած է, որ Պաքու համաձայն է առարկայական բանակցութիւնները շարունակելու ԵԱՀԿ-ի Մինսքի խմբակի համանախագահներու կոչին:

Ան յայտնած է, թէ Պաքու համանախագահներուն անգամ մը եւս ներկայացուցած է տազնապի լուծման հոլովոյթին վերաբերեալ Ազրպէյճանի դիրքորոշումը, եւ կարծիքներ փոխանակուած են բանակցային հոլովոյթը աշխուժացնելու կարելիութիւններուն մասին:

«Բարի մտադրութիւններով բանակցութիւնները կրնան դրական արդիւնք տալ: Այդ պատճառով մենք կը պաշտպանենք բարի մտադրութիւններու եւ քաղաքական կամքի հիման վրայ առարկայական բանակցութիւնները շարունակելու ԵԱՀԿ-ի Մինսքի խմբակի համանախագահներուն կոչը: Ազրպէյճանական կողմը բազմիցս յայտարարած է, որ պատրաստ է տազնապի լուծման ուղղութեամբ առարկայական բանակցութիւններ իրականացնելու», ըսած է Մամետեարով:

Ան պնդած է նաեւ, թէ ժամանակը հասած է, որ տազնապի լուծման ուղղութեամբ լուրջ քայլեր ձեռնարկուին:

ՄԻՋԱԶԳԱՅԻՆ

**Պատասխանելով Ռուսիոյ Կատարած Սպառնալիքին՝
Փենթակոն. «Վտանգուելու Պարագային՝ Պիտի
Չտատամսինք Մենք Մեզ Եւ Մեր Գործընկերները
Պաշտպանելու»**



Միացեալ Նահանգներու պաշտպանութեան նախարարութիւնը՝ Փենթակոնը յայտարարեց. «ՏԱՀԵՇ-ի դէմ պայքարի միջազգային դաշինքի գործողութեանց կեդրոնը Իրաքի հետ սահմանին մօտ սուրիական վարչակարգին պատկանող առանց օդաչուի թռչող սարքի կործանիչներու կողմէ վար առնուելէն առաջ կապ չհաստատեց Սուրիոյ մէջ ռուսական գործողութիւններու կեդրոնին հետ»:

Փենթակոնի բանբեր Ժեֆ Տէյվիս յայտնեց, որ «Էֆ-15» տիպի ամերիկեան օդանաւ մը երկուշաբթի օր Թանաֆ շրջանին հիւսիսը եւ Եփրատ գետին արեւմուտքը գտնուող տարածքի մը վերեւ վար առած է նշեալ օդանաւը:

Պատասխանելով Սուրիոյ մէջ ապահով գօտիներու վերաբերեալ երկու կողմերուն միջեւ «հաղորդակցութեան կապը» առկայելու Ռուսիոյ յայտարարութեան մասին հարցումի մը՝ Տէյվիս ըսաւ. «Հաղորդակցութեան կապը միջազգային դաշինքին կողմէ բաց է եւ կը գործէ: Իսկ ինչ կը վերաբերի ռուսական կողմին, ապա կը յանձնարարեմ, որ այդ մասին հարցնէք Ռուսիոյ»:

«Դէպքը տեղի ունեցաւ շատ արագ: Կացութեան հրատապութեան պատճառով առիթ չունեցանք ռուսերուն հետ կապ հաստատելու», ըսաւ ան:

«Միջազգային դաշինքը սկիզբը ջանաց օդանաւը վար առնելէ առաջ արգելք հանդիսանալ անոր», նշեց Տէյվիս՝ աւելցնելով. «Արգելք հանդիսանալու գործողութեան եւ վար առնուելուն միջեւ վայրկեաններ գոյութիւն ունին»:

Փենթակոնի բանբերը նաեւ յայտնեց, որ ամերիկեան օդուժը սուրիական վարչակարգին ու անոր կողմնակիցներուն վերջին քայլերէն ետք Սուրիոյ մէջ իր գործողութիւններուն վերաբերեալ կարգ մը վերադասաւորումներ կատարած է:

Սուրիական օդանաւի վար առնուելու միջադէպէն ետք Ռուսիոյ պաշտպանութեան նախարարութիւնը յայտարարած էր, որ Սուրիոյ մէջ օդուժի մարտական խնդիրներու կատարման շրջաններուն մէջ որեւէ օդանաւ կամ անօդաչու թռչող սարք Ռուսիոյ հակաօդային պաշտպանութեան միջոցներուն կողմէ պիտի ընկալուի իբրեւ թիրախ:

Փենթակոնի բանբերը, պատասխանելով այդ մասին հարցումի մը, յայտարարեց. «Տեղեակ ենք ռուսական յայտարարութենէն: Սուրիոյ մէջ ՏԱՀԵՇ-էն բացի որեւէ կողմի հետ տագնապ չենք ուզեր, սակայն պիտի չտատամսինք մենք մեզ կամ մեր գործընկերները պաշտպանելու, եթէ վտանգուինք»:

Իրանեան Քոմ Քաղաքին Մէջ Վնասազերծուած Է Ահաբեկչական Բջիջ Մը



Քոմի նահանգապետի քաղաքական եւ անվտանգութեան հարցերով օգնական Ահմետ Շամալի յայտարարեց, որ անցեալ օրերուն ընթացքին ահաբեկչական բջիջ մը վնասազերծուած է:

Իրանեան «Մեհր» լրատու գործակալութիւնը հաղորդեց, որ Շամալի Քոմի նահանգապետական խորհուրդի ժողովին ընթացքին յայտնած է, որ Քոմ քաղաքը կը նկատուի ՏԱՀԵՇ-ի հարուածել ցանկացած գլխաւոր թիրախներէն մէկը:

Ան նշած է, որ Թեհրանի մէջ վերջերս արձանագրուած ահաբեկչական գործողութիւններուն ժամանակ անվտանգութեան մարմինները յաջողած են Քոմի մէջ ահաբեկչական բջիջի մը անդամները ձերբակալել:

Թուրքիան Սկսած Է Սննդամթերք Մատակարարել Քաթարին Ո՛չ Միայն Օդային, Այլ Նաեւ Ցամաքային Եւ Ծովային Ճամբով



Թրքական «Հիւրրիյէթ» օրաթերթը կը հաղորդէ, որ Թուրքիա ն սկսած է ջուր եւ սննդամթերք մատակարարել Քաթարին ո՛չ միայն օդային, այլ նաեւ ցամաքային եւ ծովային ճամբով: Այս մասին յայտնած է Թուրքիոյ տնտեսութեան նախարար Նիհաթ Չէլպէքճի:

«Մեզմէ հիմնականին մէջ կաթնամթերք ու հաւկիթ ուզած են: Արդէն չորս հազար թոն բեռով նաւը ճամբայ ելած է: Իսկ 11 հազար թոն տարողութեամբ բեռնատար նաւ մը եւս Քաթար պիտի ուղղուի շատ բեռնատար նաւ մը եւս Քաթար պիտի ուղղուի շատ

շուտով: Հիմա ալ սկսած ենք բեռնատարներով առաքումը: Այն ժամանակ, երբ բոլորը կը տատանսէին Քաթարի հարցին մէջ, մենք այնտեղ էինք: Այսուհետեւ ալ Թուրքիան Քաթարի կողքին պիտի ըլլայ, ատիկա այլեւս անհրաժեշտութիւն է», ըսած է Չէլպէքճի:

Յայտնի է, որ մինչեւ այս պահը Թուրքիան 90 օդանաւ սնունդ մատակարարած է Քաթարին:

Յիշեցնենք, որ Սէուտական Արաբիան, Եմէնը, Եգիպտոսը, Արաբական Միացեալ Էմիրութիւնները, Լիպիան, Մալտիւեան կղզիներն ու Պահրէյնը խզած են Քաթարի հետ դիւանագիտական կապերը: Բացի ատկէ, Քաթար հեռացուած է Սէուտական Արաբիոյ գլխաւորած եւ Եմէնի մէջ զինեալներու դէմ կռուող դաշինքէն:

Քաթարի դէմ արշաւին միացած են նաեւ այլ երկիրներ:

Մոհամետ Պըն Մալման Սէուտական Արաբիոյ Գահաժառանգ Եւ Փոխվարչապետ Նշանակուեցաւ

Սէուտական պետական լրատու գործակալութիւնը հաղորդեց, թէ հրապարակուած է թագաւորական հրամանագիր մը, որ Մոհամետ պըն Նայեֆ պըն Ապտել Ազիզ իշխանը ազատ կը կացուցէ գահաժառանգի, փոխվարչապետի եւ ներքին գործոց նախարարի պաշտօնէն:

Մէկ այլ հրամանագիրով Մոհամետ պըն Մալման պըն Ապտել Ազիզ իշխանը կը նշանակուի գահաժառանգ եւ փոխվարչապետ՝ պահպանելով պաշտպանութեան նախարարի պաշտօնը:



Ապտել Ազիզ պըն Սէուտ պըն Նայեֆ իշխանը իր կարգին նշանակուած է ներքին գործոց նախարար:

Սէուտական լրատու գործակալութիւնը կը նշէ, որ պաշտօններու հոշակման մարմինի 34 անդամներէն 31-ը Մոհամետ պըն Մալմանը ընտրած են գահաժառանգ:

Եւրոպական Յանձնաժողովը Պիտի Օժանդակէ Հայաստան Ապաստանած Սուրիահայ Գաղթականներուն



Չորեքշաբթի օր Եւրոպական Միութեան յանձնաժողովի շրջանային օժանդակութեան հիմնադրամը՝ ընդառաջելով սուրիական տագնապին ահազանգներուն, որդեգրած է նոր ծրագիրներ, որոնց ընդհանուր գումարը կը հասնի 275 միլիոն եւրոյի: Այս ծրագիրներուն միջոցով Եւրոպական Միութիւնը պիտի օժանդակէ սուրիացի

գաղթականներուն եւ զանոնք հիւրընկալող համայնքներուն Թուրքիոյ, Լիբանանի, Յորդանանի, Իրաքի, Արեւմտեան Պալքաններուն եւ Հայաստանի մէջ:

Վերոնշեալ ընդհանուր գումարէն միայն 3 միլիոն եւրոն պիտի տրամադրուի Հայաստանի մէջ գաղթականներու օժանդակութեան, որ կ'ընդգրկէ բնակարանային պայմաններու բարելաւումը, առողջական եւ հոգեբանական-ընկերային ծառայութիւններու մատչելիութիւնը, տնտեսական կարելիութիւններու ընդլայնումը եւ աշակերտներու ու ուսանողներու համարկումին դիւրացումը:



ԱՆԴՐԱԴԱՐՉ

Մեուտական Արաբիոյ Ոչ Մաքիավելլական Արտաքին Քաղաքականութիւնը

Սատտամ Հիւսէյնի վարչակարգին տապալումով Մեուտական Արաբիա երկրորդ անգամ ըլլալով կը խախտէ իտալացի յայտնի փիլիսոփայ Նիքոլօ Մաքիավելլի օրէնքները: Մաքիավելլի իր գիրքին՝ «Իշխանը»-ին մէջ նշած է, որ երբ երկու պետութիւններ իրարու հետ պատերազմի մէջ են, երրորդ չեզոք պետութիւն մը պէտք չէ միջամուխ ըլլայ, այնքան ատեն որ հաւասարակշռութիւն մը կայ: Երբ այս հաւասարակշռութիւնը խախտի եւ այս երկու երկիրներէն մէկը սկսի յաղթանակներ արձանագրել, ապա այն երրորդ չեզոք պետութիւնը պէտք է տկարին կողմը անցնի, որովհետեւ երբ այդ տկար կամ պարտուած երկիրը ոչնչանայ, ապա յաղթական պետութիւնը նոր ուժեր հաւաքելով՝ պիտի յարձակի այդ երրորդ չեզոք պետութեան վրայ: Հետեւաբար համաշխարհային յարաբերութիւններուն մէջ չկայ յաղթականի եւ պարտուածի միջեւ պայքար, այլ՝ ուժերու հաւասարակշռութիւն:



2003-ին Սատտամի վարչակարգին տապալումով շրջանին մէջ սիւննիները կորսնցուցին իրենց հաւասարակշռութիւնը, Մեուտական Արաբիան օժանդակեց ամերիկեան եւ անգլիական ուժերուն՝ Իրաքի վրայ յարձակման ժամանակ, այսպիսով Իրաքի մէջ սիւննիները Պաաս կուսակցութեան իշխանութեան ժամանակ իրենց ձեռք բերած քաղաքական բոլոր իրաւունքները (հակառակ իրենց փոքրամասնութիւն ըլլալուն) կորսնցուցին ի նպաստ մեծամասնութիւն կազմող շիիներուն: Ամերիկացիք չկրցան լեցնել այս դատարկութիւնը, իսկ Իրան, օգտուելով Իրաքի մէջ տիրող անկայունութենէն, թափանցեց հոն եւ տնտեսական, զինուորական ու քաղաքական օժանդակութիւն տրամադրեց Իրաքի շիիական վարչակազմին:

Մայիսին Միացեալ Նահանգներու նախագահ Տանըլտ Թրամի այցելեց Մեուտական Արաբիա եւ կարեւոր հանդիպումներ ունեցաւ թագաւորին ու Ծոցի երկիրներու ղեկավարներուն հետ: Այս հանդիպումներուն ընթացքին շեշտը դրուեցաւ ահաբեկչութեան դէմ պայքարելու եւ շրջանին մէջ իրանեան ներթափանցումը կասեցնելու անհրաժեշտութեան վրայ: Հանդիպումներուն ընթացքին յստակ դարձաւ, որ շրջանը մօտիկ ապագային կրնար նոր փուլի առջեւ գտնուիլ, եւ սպասումը երկար չտեւեց: Երբ Մեուտական Արաբիոյ, Միացեալ Նահանգներու եւ Եգիպտոսի ղեկավարները իրարու հետ կը տեսակցէին, քաթարական պետական լրատուամիջոցները «կայքահէնութեան» ենթարկուած էին եւ՝ իրանամետ յայտարարութեամբ հանդէս եկած: Երկու շաբաթ շարունակ քաթարական եւ սեուտական լրատուամիջոցները սկսան զիրար ամբաստանել, մինչեւ որ հարցը իր գագաթնակէտին հասաւ: Անշուշտ սեուտական-քաթարեան այս տագնապը իր տեսակին մէջ առաջինը չէր, 2014-ին նոյնանման դէպք պատահեցաւ, եւ աւելի ուշ քաթարական օժանդակութիւն վայելող Ժապիաթ Նուսրա ահաբեկչական խմբաւորումը եւ Մեուտական Արաբիոյ հովանաւորած Ժէյշ Իսլամ իսլամական կազմակերպութիւնը

բուն քախումներ ունեցան մասնաւորաբար սուրիական Իտլիայ եւ Ղուրթա շրջաններուն մէջ: Աւելի՛ն. շրջանային մակարդակի վրայ Քաթար կը ֆինանսաւորէ Իսլամ եղբայրներ շարժումը, որ Արաբական Միացեալ Էմիրութիւններու, Եգիպտոսի եւ Սէուտական Արաբիոյ կողմէ կ'որակուի իբրեւ ահաբեկչական կազմակերպութիւն:

Էրիքա Սուլմոն «Ֆայնէնշըլ Թայմզ»-ի մէջ լոյս տեսած իր յօդուածին մէջ կը նշէ, որ Քաթար մօտ 1 միլիառ տոլար տրամադրած է ահաբեկչական կազմակերպութիւններուն, որպէսզի վերջիններս ազատ արձակեն քաթարական իշխանական ընտանիքէն պատանդներ, որոնք առեւանգուած էին Իրաքի մէջ: Այդ գումարին 700 միլիոն տոլարը տրամադրուած է Իրաքի մէջ գտնուող շիիական զինեալ կազմակերպութիւններու, որպէսզի ազատ արձակեն 26 քաթարցի պատանդներ, իսկ 200-300 միլիոն տոլար՝ սուրիական Թահրիր Շամ խմբաւորումին, որ կապեր ունի Քայիտայի հետ, որպէսզի ազատ արձակէ մօտ 50 ժիհատականներ: Այս հարցը յարմար առիթ դարձաւ, որ Արաբական Միացեալ Էմիրութիւնները եւ Սէուտական Արաբիան դիւանագիտական պատերազմ յայտարարեն Քաթարի դէմ: Անոնց միացան նաեւ Պահրէյնը, Եգիպտոսը, Եմէնը եւ արաբական այլ երկիրներ, որոնք տնտեսական եւ դիւանագիտական պատժամիջոցներու դիմեցին Տոհայի դէմ: Արաբական Միացեալ Էմիրութիւնները աւելի անդին գացին՝ պահանջելով, որ Քաթարի մէջ տեղակայուած ամերիկեան զինուորական խարխիսը տեղափոխուի Էմիրութիւններ, իսկ Սէուտական Արաբիան պաշտօնապէս պահանջեց, որ Քաթար իր կապերը խզէ Համասի եւ Իսլամ եղբայրներուն հետ:

Վստահաբար Թուրքիա, Ռեճէփ Թայիփ Էրտողանի ղեկավարութեամբ, լուռ պիտի չմնար, եւ իր գաղափարակից Քաթարին օգնութեան հասնելու համար Թուրքիոյ խորհրդարանը ընդունեց օրինագիծ մը, որ կանաչ լոյս կու տար կառավարութեան՝ զինուորական ստորաբաժանում մը դրկելու Քաթար, իսկ Իրան իր բոլոր ջանքերը ի գործ դրաւ՝ օգնութեան հասնելու Քաթարին եւ իր ազդեցութեան տակ պահելու արաբական այս երկիրը:

Սէուտական Արաբիան այս յարմար առիթին կը սպասէր, որպէսզի հրապարակէն վերցնէր փոքր իշխանապետութիւն մը, որ շրջանին մէջ կը փորձէր իրեն հետ մրցակցիլ, սակայն այս միջոցով Սէուտական Արաբիան աւելի եւս բաժան-բաժան ըրաւ արդէն իսկ կոտորակուած սիւննիական աշխարհը:

Քաթարի իշխանութեան կը մնայ երկու ընտրանք, կա՛մ ընդունիլ Սէուտական Արաբիոյ քաղաքական գիծը եւ շրջանային քաղաքականութեան մէջ դեր չունենալ, կա՛մ ալ դառնալ Իրանի պատանդը: Այսպէս թէ այնպէս, երկու կողմէն ալ Քաթար պարտուած դուրս պիտի գայ, բայց եթէ դառնայ Իրանի քաղաքական պատանդը, ապա շատ բան կրնայ փոխուիլ շրջանին մէջ, Ծոցի երկիրներու, Սուրիոյ, Լիբանանի, Եգիպտոսի եւ Իրաքի մէջ շատ մեծ փոփոխութիւններ կրնան կատարուիլ քաղաքական քարտէսին վրայ, եւ Քաթար, Իրան եւ Թուրքիա կրնան Սէուտական Արաբիան դուրս դնել շրջանի քաղաքական հաշիւներէն: Սէուտական Արաբիա իր անհիմն եւ կոյր արտաքին քաղաքականութեան պատանդը կը դառնայ:

ԵՂԻԱ ԹԱՇՃԵԱՆ

ԼՈՒՐԵՐ ԳԱՂՈՒԹՆԵՐԷՆ

Գագիկ Գինոսեան Ամմանի Մէջ

16-23 մայիսին Ամման (Յորդանան) այցելեց «Կարին» ասանդական երգի-պարի խումբի հիմնադիր-գեղարուեստական ղեկավար, Գագիկ Գինոսեանը, որ ունեցաւ հանդիպումներ հայ համայնքին հետ ինչպէս նաեւ պաշտօնական հանդիպումներու:



Հայաստանի մշակոյթի նախարար Ա. Ամիրեանի յանձնարարութեամբ Հայաստանի դեսպան Արշակ Փոլատեանի միջնորդութեամբ կազմակերպուեցան 2 հանդիպումներ՝ Յորդանանի մշակոյթի նախարար Նեպիհ Շուքումի հետ:

Ան հանդիպում ունեցաւ ճարաշ փառատօնի տնօրէնութեան հետ, որոնք նկատի ունենալով «Կարին»-ի յաջողութիւնները-միջազգային ճանաչումը՝ փափաքեցան «Կարին» խումբի մասնակցութիւնը՝ ճարաշի փառատօնին: Գինոսեան նաեւ հանդիպում ունեցաւ համապատասխան մասնագէտներու հետ՝ քննարկելու պարարուեստի ծիրէն ներս զանազան հարցեր:

Գ. Գինոսեան ինքնաճանաչ սերունդ կերտելու համար հանդէս եկաւ «Մշակոյթը որպէս ազգային ինքնութիւն թեմայով դասախօսութեամբ, որուն ընդմէջէն ծանօթացուց հայ ազգի հարուստ ժառանգութիւնը եւ անդրադարձաւ հայ ըլլալու հպարտ զգացումին:

«Հայոց Լեռներու Ոգին» Ազգային Պարի երեկոյ

«Մեր պարերը եւ մենք» պարուսուցման ծրագիրը պիտի գործէ Յորդանանի մէջ, որուն միջոցով հայ մշակոյթի բոլոր սիրահարները պիտի սորվին հայկական պարարուեստի այբուբենը եւ պիտի փորձեն հայ ասանդական մշակոյթը վերադարձնել հայ կենցաղ:



Գագիկ Գինոսեան այցելութիւններ տուաւ նաեւ ԱՄՄ-ի, ՀՕՄ-ի-ՀՄԸՄ-ի ակումբները եւ տեսակցութիւն ունեցաւ վարչութեանց անդամներու հետ:

Ան մօտէն ծանօթացաւ ՀՕՄ-ի «Արագ» պարախումբին, որուն պարուսոյց Անի Քիզիբեանը 2015-ին մասնակցած էր «Սփիւռք ամառնային դպրոց»-ի ազգային երգի խմբավարներու եւ պարուսոյցներու վարպետութեան դասընթացներուն:

«Արագ» պարախումբը ելոյթ ունեցաւ Գինոսեանի դիմաց, որ իր ցուցմունքները տուաւ անոնց:

Ակնոցներ` Արցախի Երեխաներուն

Յունաստանի Հայ դատի յանձնախումբին նախաձեռնությամբ, երկրորդ տարին ըլլալով, շնորհիւ յոյն բարերար Սթարոս Քոյիսի, կենսական օժանդակութիւն կը հասնի Արցախի կարիքաւոր երեխաներուն:

Անցեալ տարին սկիզբ առած այս ծրագրի հիմամբ, տեսողութիւնը սրբագրող ակնոցներ կ'ուղարկուին Արցախ` Սիրոս կողմին մէջ բնակութիւն հաստատած



Սթարոս Քոյիսի կողմէ:

Ծանօթ է արդէն Սիրոս կողմի բնակիչներուն ազնիւ հոգատարութիւնը` Արցախէն ամէն ամառ կողմի ժամանող երեխաներուն հանդէպ: Իւրաքանչիւր յոյն բնակիչ, իր մասնագիտութեան կամ աշխատանքի ասպարէզին բերումով, իրենց նուէրներով տարիներէ ի վեր կ'օժանդակեն Յունաստանի Հայ դատի յանձնախումբի ծրագիրներուն: Ս. Քոյիս մեծ ուրախությամբ կը կատարէ այս մատուցումը` ակնոցները պատրաստելով եւ Յունաստանի Հայ Դատի յանձնախումբին միջոցաւ Արցախի փոքրիկներուն ձրիաբար բաժնելով, օրինակելի եւ տիպար իր կեցուածքով, սատարելով հերոսական Արցախի ժողովուրդի զաւակներուն: Իր այս նուէրին համար Ս. Քոյիսին շնորհակալութեան նամակներ դրկուած են Յունաստանի Հայ դատի յանձնախումբին եւ Արցախի Հանրապետութեան առողջապահութեան նախարար Կարինէ Աթայեանի կողմէ:

WWW.AZTAGDAILY.COM

Միեր Սահակեանի Ելոյթը Օքսֆորտ Համալսարանին Մէջ

25-26 մայիսին աշխարհի լաւագոյն տասը համալսարաններէն Օքսֆորտ համալսարանին մէջ տեղի ունեցաւ «Տեսակետներու քախում. Ռուսիոյ արտաքին քաղաքականութիւնը Սիի եւ Թրամփի ժամանակաշրջանին» գիտաժողովը: Օքսֆորտ համալսարանի կողմէն ընտրուած միջազգայնագէտներ, դիւանագէտներ ժամանած էին Օքսֆորտ՝ ներկայացնելու իրենց գիտական ուսումնասիրութիւնները: Այս գիտաժողովին որպէս բանախօս հրաւիրուած էր Չինաստանի հայկական համայնքի նախագահ եւ «Չինաստան-Եւրասիա քաղաքական եւ ռազմավարական ուսումնասիրութեան խորհրուրդ»-ի ղեկավար Միեր Սահակեանը որ ներկայացուց իր գիտական ուսումնասիրութիւնը՝ նուիրուած Ռուսիոյ համաշխարհային մեծ քաղաքականութիւն վերադառնալու վերաբերեալ:

Յայտնենք, որ Միեր Սահակեանը առաջին հայ հետազոտողն է, որ միջազգային յարաբերութիւններու մասնագիտութեամբ գիտական թեզ պաշտպանած է Չինաստանի Նանձինի համալսարանին մէջ: Ան նաեւ կ'անդամակցի «Միջազգային քաղաքական գիտութիւններու ընկերակցութեան»: Միեր Սահակեանի միջազգային յարաբերութիւններու վերաբերեալ աշխատութիւնները տպագրուած կամ ներկայացուած են Ռուսիոյ, Մեծն Բրիտանիոյ, Չինաստանի, Հայաստանի, Ամերիկայի Միացեալ Նահանգներու եւ Հոլանտայի մէջ:

Եղիշէ Չարենցի Ծննդեան 120-ամեակի Նշում

Կազմակերպութեամբ Համազգայինի Նիւ Եորքի մասնաճիւղին 19 մայիսին, Նիւ Եորքի Հայ կեդրոնին մէջ տեղի ունեցաւ գրական երեկոյ՝ նուիրուած մեծատաղանդ բանաստեղծ Եղիշէ Չարենցի ծննդեան 120-ամեակին: Համազգայինի վարչութեան անունով Արմինէ Մինասեան ներկայացուց օրուան բանախօս Չարմինէ Պօղոսեանը եւ հրաւիրեց զայն ներկայացնելու Չարենցը:



Պօղոսեան մանրամասնօրէն ներկայացուց Չարենցի կենսագրականը եւ անոր ունեցած բեղուն գործունէութիւնը գրական, խմբագրական եւ հանրային մարզերուն մէջ: Բանախօսութեան զուգահեռ, պաստառի վրայ ցուցադրուեցաւ Չարենցի տուն թանգարանը՝ Մաշտոցի պողոտային վրայ, օղակաձեւ այգիի համալիրին մէջ արձանը, Չարենցի կամարը՝ Երեւանէն Գառնի տանող ճանապարհին վրայ: Չարենցի անունով կոչուած են դպրոցներ եւ փողոցներ Հայաստանի զանազան մարզերուն մէջ:

Ձեռնարկի ընթացքին գործադրուեցաւ գեղարուեստական յայտագիր:

WWW.AZTARAR.COM

Վիրահայ Երիտասարդը Դարձավ ՄԱԿ-ի Մէջ Վրաստանի Երիտասարդութեան Ներկայացուցիչ

Վրաստանի մարմնակրթութեան եւ երիտասարդութեան հարցերով նախարարութեան «ՄԱԿ-ի մէջ Վրաստանի երիտասարդութեան ներկայացուցիչը» ծրագիրին յաղթող ճանչցուած է թիֆլիսահայ Կիորկի Տումասեանը:

21 մասնակիցներ անցած էին երեք նախընտրական փուլերէ: Երրորդ փուլ անցած մասնակիցները յանձնաժողովին առջեւ ներկայացուցած են հանրային ելոյթ՝ «Չեւրնճ ֆէյսինկ եութ ան նաշընըլ էնտ ինթըրնաշընըլ լեվել-սիմիլարիթիս էնտ տիֆըրընսս» թեմայով: Յաղթողը ընտրուած է միաւորները ամփոփելէ ետք:



Վրաստանի մարմնակրթութեան եւ երիտասարդութեան հարցերով նախարարութիւնը, արտաքին գործոց նախարարութեան աջակցութեամբ, արդէն քանի մը տարի է վեր յաջողութեամբ կ'իրականացնէ «ՄԱԿ-ի մէջ Վրաստանի երիտասարդութեան ներկայացուցիչը» ծրագիրը:

Երիտասարդութեան ներկայացուցիչներու ծրագիրը կը համարուի Միացեալ ազգերու կազմակերպութեան յաջող նախաձեռնութիւններէն մէկը: ՄԱԿ-ի գլխաւոր վեհաժողովը 1981-ին, առաջին անգամ ըլլալով, կոչ ըրած էր անդամ երկիրներուն՝ երիտասարդ պատուիրակներ ընդգրկելու երկրի պաշտօնական պատուիրակութիւններու կազմին մէջ:

Ընտրուած մասնակիցը երիտասարդներու հետ կ'իրականացնէ խորհրդատուութիւններ եւ հանդիպումներ:


Երիտասարդութեան ներկայացուցիչը շուտով պիտի մեկնի ՄԱԿ-ի գլխաւոր գրասենեակ (Նիւ Եորք), ուր իբրեւ Վրաստանի պատուիրակութեան լիիրաւ անդամ՝ պիտի մասնակցի Ընդհանուր ժողովի երրորդ կոմիտէի ձեռնարկին եւ կոմիտէի լսումներուն, ելոյթ պիտի ունենայ նոյն կոմիտէի նիստին եւ մասնակցի երիտասարդութեան մասին որոշումներու մշակման: Կիորկի Տումասեան կրնայ մասնակցիլ նաեւ տնտեսական եւ հասարակական խորհուրդի հասարակական զարգացման յանձնաժողովի նիստերուն:

2012-2016 տարիներուն ՄԱԿ-ի մէջ Վրաստանի երիտասարդութեան ներկայացուցիչներն էին՝ Կիորկի Ճելիանի, Թորնիկէ Զուրապիշվիլի, Լաշա Շաղուլաշվիլի, Մարիամ Սիխարուլիժէ եւ Թաթիա Տոլիժէ:

WWW.LRAGIR.AM

ԱԿՆԱԼԿ

Պտոյտ Սը Հայոց Լեզուի Բառարանին Մէջ. Հոգ Չէ, Սխալ Խօսեցէք, Բայց...



Ոմանք վախնալով, որ սխալ կը խօսին, կը խուսափին հայերէն խօսելէ, եւ եւս անոնց շարունակ կ'ըսէի.

– Հոգ չէ, սխալ խօսեցէք, բայց հայերէն խօսեցէք:

Այսօր ալ նոյնը կ'ըսեմ ու պիտի ըսեմ: Միայն թէ սխալ խօսիլ կայ, սխալ խօսիլ ալ կայ: Կարգ մը սխալներ կրնան նեղ կացութեան մատնել մարդը, նոյնիսկ կրնան գործ բանալ անոր գլխուն:

Ուրիշ լեզուներ զիս չեն շահագրգռեր, բայց հայերէնը իր հարուստ բառապաշարով կրնայ սխալ խօսած ըլլալու ծուղակներ լարել մեզի: Ասիկա կատակի նիւթ ալ կրնայ դառնալ: Ուստի մենք այս կատակի կողմէն մօտենանք եւ փնտռենք, թէ սխալ արտասանութիւններ ինչ արդիւնքներ կրնան տալ մեր մայրենիով խօսողներուն:

Յիշեմ մեր դպրոցները: Դպրոցներուն համար կ'ըսենք, որ ասոնք ուսում կը ջամբեն: Ջամբել բայը կը նշանակէ տալ, մատակարարել: «Ուսում ջամբել» բացատրութիւնը կը նշանակէ ուսում տալ, ուսում մատակարարել: Դպրոցները ուսում կու տան, ուսում կը ճամբեն: Այս ջամբել բառը արդէն ուսումէն գատ ո՛չ մէկ բառի հետ կը գործածենք: Դպրոցները ուսում կը ջամբեն: Բայց չըլլայ, որ ձայնային նմանութենէ խաբուելով ըսէք.

– Դպրոցները ուսում կը ճամբեն:

«Ջամբել»-ու եւ «Ճամբել»-ու միջեւ մեծ տարբերութիւն կայ: Մէկը տալ կը նշանակէ, միւսը վոնտել: Դպրոցը ուսում չի վոնտեր: Ուսում կու տայ:

Բոլորս ալ մեր ապրած երկրի օրէնքներուն հպատակելով՝ տուրք կը վճարենք, հարկ կը վճարենք: Հարկը տուրք կը նշանակէ: Ան, որ իր տուրքը կը վճարէ, իրաւունք կ'ունենայ ըսելու կամ գրելու.

– Ես հարկատու եմ:

Բայց չըլլայ, որ ձայնի նմանութենէ խաբուելով՝ ըսէ.

– Ես յարկատու եմ:

Այն ատեն կը ստիպուի տալ ո՛չ թէ իր հարկը, այլ՝ իր յարկաբաժինը:

Անշուշտ կը կատակենք: Բայց այս կատակը մեզի մտածել կու տայ, կամ մտածել պէտք է տայ մեր լեզուին մէջ գործածուած ինչ-ինչ նմանաձայն բառերու մասին: Փոքրիկ սխալով մը այդ մէկ բառէն կրնաք ցատկել դէպի միւս բառը: Ահաւասիկ՝ աշակերտ մը, որ բաւական երկար ժամանակէ ի վեր իր դպրոցական դասերուն վրայ կ'աշխատի: Կը հարցնենք, թէ ի՛նչ կ'ընէ: Ան կ'երեւի, թէ ուսուցիչէն նոր սորված է, կը գործածէ գեղեցիկ բառ մը.

– Դաս պատրաստելով կը պարապիմ:

«Պարապիլ»-ը պարապ բառին հետ կապ չունի, զբաղիլ կը նշանակէ: Մեր աշակերտը մեզի ըսաւ, որ «Դաս պատրաստելով զբաղած է»: Բարեբախտաբար ճիշդ ըսաւ: Կրնար սխալ մը գործել ու ըսել.

– Դաս պատրաստելով կը տառապիմ:

Թերեւս իսկապէս կը տառապի իր այդ դասը սորվելու ընթացքին, բայց գիտենք, որ ան այդպէս ըսել չէր ուզած:

Շատ անգամ անդրադարձած ենք այն նմանութեան, որ կը գտնուի «Ճար» ու «Ճառ» բառերուն միջեւ: Ոմանք իրարու հետ կը խառնեն՝ արդէօք հնչիւնով այնքան մօտիկը, բայց իմաստով այնքան հեռու այս երկու բառերը: Չեմ կարծեր, որ կը խառնեն, հայախօս մարդը այնքան մը գիտէ: Բայց թերեւս ուղղագրութեան մէջ այնքան ալ վարպետ չէ: Ուստի, եթէ դժուարութեան մը դիմաց լուծում չի կրնար գտնել, եթէ այդ դժուարութիւնը չի կրնար յաղթահարել, պիտի գրէ:

– Ճար չունիմ:

Չըլլայ, որ գրէ «Ճառ չունիմ»: Աղէտ չի պատահիր անշուշտ, բայց դիմացինը կը կարծէ, որ ան խօսելու խօսք, ըսելու ճառ չունի:

Ճառ խօսիլ: Աւելի գեղեցիկ բառը ունիմք: Ճառախօսութիւն: Ճառախօսներ շատ կան մեր շուրջ, մանաւանդ ակադեմական շրջանակներէ ներս: Ասոնք յաճախ հոս ու հոն կը հրաւիրուին զանազան նիւթերու մասին ճառախօսելու: Ահա անոնցմէ մէկը, որ կ'ըսէ:

Այս իրիկուն պիտի ճառախօսեմ:

Չըլլայ, որ սխալ հասկնաք ու կարծէք, որ ան կ'ըսէ:

– Այս իրիկուն պիտի չարախօսեմ:

Թէեւ աշխարհի վրայ, մանաւանդ քաղաքական մարզէ ներս, շատեր բեմ կը բարձրանան, որպէսզի չարախօսեն, որպէսզի ասոր անոր հասցէին չարախօսութիւն ընեն, բայց մեր գործը հիմա մեր արժանատր ճառախօսներուն հետ, է եւ անոնք ալ իրենց կարգին գործ չունին չարախօսութեան հետ: Անոնք թերեւս կրնան երբեմն գործ ունենալ «չատախօսութեան» հետ, բայց անոնցմէ ոչ մէկը անշուշտ մեզի պիտի ըսէ:

– Այս իրիկուն պիտի շատախօսեմ:

Եթէ կատակը մէկդի ընենք, պիտի ըսենք, որ բարեբախտաբար վերիններուն նման սխալներ չեն գործուիր մեր արդէն բառերու աղքատութեամբ ընթացող խօսակցութիւններու ընթացքին: Այս պատճառով ալ պիտի շարունակենք ըսել:

– Սխալ խօսեցէք, հոգ չէ, բայց մեր մայրենիով խօսեցէք:

Այնուհանդերձ ահաւասիկ մեր մէկ բարեկամը, որ իր կնոջը հետ թեւ-թեւի մեր դիմաց կ'ելլէ: Կը խօսինք: Կը խօսինք ամուսնական կեանքի մասին: Մեր բարեկամը կ'ըսէ:

– Ամուսնութիւնը կեանքի յորձանքի մաս կը կազմէ:

Իրաւունք ունի: Ամուսնութիւնը բնականոն պայմաններու մէջ կեանքի յորձանքին, այսինքն կեանքի հոսանքին, կեանքի գնացքին մասերէն մէկն է: Բայց չըլլայ, որ լեզուն սայթաքի ու ըսէ:

– Ամուսնութիւնը կեանքի փորձանքին մաս կը կազմէ:

Խեղճը առաջին ապտակը պիտի ստանայ իր կնոջմէ:

Ռ. Հատտէճեան

ԱՅԼԱԶԱՆ

Արմաւին Անհամար Բարիքները



100 կրամ արմաւը 287 ջերմութ կը պարունակէ: Անիկա հարուստ է Պէ. 2, Պէ. 3, Պէ. 5 եւ Պէ. 6 կենսանիւթերով, հանքայիններով (փոթասիում, կիր), քրոմով եւ բնաթելով:

Աշխարհի 3 մեծագոյն արմաւ արտադրող երկիրներն են՝ Եգիպտոսը, Իրանը եւ Սէուտական Արաբիան:

Շաքարախտաւորները պէտք է չափաւորեն անոր սպառումը եւ օրական 5 արմաւէն աւելի չուտեն:

Ստորեւ՝ արմաւին անհամար բարիքները.

- Երկաթով հարուստ արմաւը օգտակար է արեան տկարութենէ տառապողներուն:
- Զէաքսանթինով եւ լիւթէինով հարուստ արմաւը կը պահպանէ տեսողութիւնը, որ տարիքի հետ կը տկարանայ:
- Կիրով հարուստ է, իսկ կիրը կը դարմանէ փորհարութիւնը: Անոր պարունակած բնաթելը կ'ապահովէ մարսողական դրութեան առողջ գործունէութիւնը եւ կը պաշտպանէ աղիքները:
- Ուսումնասիրութիւններ փաստած են, որ օրական 3 արմաւ ուտելով՝ կարելի է պակսեցնել երակներուն պատերուն կուտակուող իւղին քանակը եւ բնականաբար նուազեցնել սրտանօթային հիւանդութիւններու հաւանականութիւնը:
- Փոթասիումով հարուստ եւ սոտիումով աղքատ արմաւը նաեւ կը նուազեցնէ արեան զերճնշումը:
- Ֆոսֆորով հարուստ արմաւը նաեւ կ'աշխուժացնէ մտային կարողութիւնները:
- Բնական շաքարով հարուստ արմաւը կ'աշխուժացնէ եւ ուժ կու տայ մարմնին:
- Չոր մաշկին, դիւրաբեկ մազերուն, ճաքճքած շուրթերուն կանխահաս կնճիռներուն լաւագոյն դեղը արմաւն է: Անով նոյնիսկ դէմքի ծեփուկներ կը պատրաստեն:

Արմաւ գնելու ատեն թելադրելի է ընտրել կորիզով, մութ գոյնի եւ կնճռոտ տեսակը: Անիկա պէտք է ըլլայ լման, փափուկ ու անփայլ:

WWW.ARMENIANPRELACYKW.ORG

ՀԱՅՐԱՊԵՏԱԿԱՆ ՄԱՂԹԱՆՔ

ՆՈՐԻՆ ՍՐԲՈՒԹԻՒՆ
Տ. Տ. ԱՐԱՄ Ա. ՎԵՀԱՓԱՌ ՀԱՅՐԱՊԵՏԻ
ԸՆՏՐՈՒԹԵԱՆ ԵՒ ՕԾՄԱՆ
22-ՐԴ ՏԱՐԵՂԱՐՁԻՆ ԱՌԻԹՈՎ



ՈՒՐԲԱԹ, 23 ՅՈՒՆԻՍ 2017ԻՆ

Քուլեթի նորակառույց Սրբոց Վարդանանց եկեղեցույ մէջ,
յընթացս Սուրբ Էս Անանի Պատարագի,
տեղի պիտի ունենայ

ՀԱՅՐԱՊԵՏԱԿԱՆ ՄԱՂԹԱՆՔ

*Սուրբ Աթոռիս
Վեհափառ Հայրապետին*

Կը հրատիրենք մեր ժողովուրդը, ներկայ գտնուելու,
հաղորդուելու օրուան պատգամով եւ հոգեպարար սոթթքներով
Վեհափառ Հայրապետին արեւշատոյթին եւ
բեղուն գործունէոյթին մատթելու, հովուապետական
իր առաքելոյթեան մէջ:

ԴԻՒՄՆ
ԱԶԳԱՅԻՆ ԱՌԱՋՆՈՐԴԱՐԱՆԻ